

# ЛҰИМА СЭРИПОС

21 февраля  
2019 года  
№4  
(1190)

Общественно-  
политическая газета  
Ханты-Мансийского  
автономного  
округа-Югры

[www.khanty-yasang.ru](http://www.khanty-yasang.ru)

E-mail: [gazeta@khanty-yasang.ru](mailto:gazeta@khanty-yasang.ru)

Основана 11 февраля 1989 года

## Хум хōтпат янытлыянув!

Ты  
номерт  
ЛОВИНЫТЭН:

Щёмьят  
мұсхал щирыл  
нётает

3

Тав мōт хōн  
ман олункве  
минас

7

Лұсум мāньщи  
хум олупсатэ

8

Чечня мāt  
хōнтлум  
мāньлат  
пыгкве

14

Вāрнэ нэпакув  
30 тālэ  
тōвлум кастыл  
янытлавесұв

16



Л. Теткина-Варум-Хури

Ты хурит мāньщи пыг Семён Алгадьев пōслым ōлы.  
Тав армиян вуйвес, Севастополь ұст яныг нāиңхāпыл щāрщит  
яласым лусыты, Семён урыл 9 лōпсыт ловиньтэн.

## ЛЯХХАЛЫТ

# Номтың кўщаит кассыт

**Р**ётың юсвой  
Этпост Ханты-  
Мансийск ўст яныг  
мирколт округ кўщай  
нэ Наталья Комарова  
пунктотнэ маҳум  
акван-атыгласанэ.  
Молал Россия  
яныгыл «Лидеры  
России» нампa касыл  
щёпиталвес. Ты  
вармалын пуссын  
аквьёт китсат арыгтем  
элумхолас хасхатас.  
Ань нөх-патум хотпат  
юв ёхтысыт. Тыг  
танки рупатаныл урыл  
потыртасыт.

Уральский феде-  
ральный округт өлнэ  
пунктотнэ хотпат Ека-  
теринбург ўст акван-  
атхатыгласыт, тот кас-  
сыт. Мән округувныл  
хүрум сөтыра хотпан  
нупыл хүрум заявка-  
нэпак тув кётыглавес.  
Тыгыл атпан нупыл  
хүрум элумхолас элалы  
касункве пёриявёсыт.  
Юи-өвыл каснэ вар-  
малы өлум порат мән  
округувныл нила хот-  
па нөх-патсыт.

## Сосса маҳум ишхипың утыл ханищтавет

Ханты-Мансийск ўс-  
ныл Дмитрий Тей нөх-  
патыс. Ты хум такви  
рупататэ варим олы.  
Тав проектэ руш ши-  
рыл «IT-стойбище»  
намаим олыс. Манылат  
хум вөр павлытыт өл-  
нэ маҳум ишхипың  
утыл ханищтыанэ. Ты-  
мағыс тав Белоярский  
район Нумто павылн  
ялыс. Тот ханты ма-  
хум өлэгыт. Тананыл  
интернет хосыт эрнэ  
тэлат варункве хултыг-  
ласанэ.

Ань ишхипың ут  
хосыт юн акв мат ма-  
тыр эрнэ нэпак мағыс  
ойтхатуңкве манос нэ-

паканын кётуңкве рө-  
ви. Ысн минуңкве ат  
эри. Интернет ворт ос  
элын өлнэ маҳум ма-  
гыс варава ке, тананыл  
кўпнит ос ёмас паты.  
Сосса маҳумн ты йиль-  
пи утын ханищтах-  
туңкве сака мўстыс.  
Хум рупататэ мағыс  
сака янытлавес.

## Агит-пыгыт рупатал хонтавет

Андрей Кныш Сур-  
гут ўс «ООО Информ-  
бюро» мат кўщаиг рў-  
питы. Тав «Йильпи вар-  
малы» нампa проект  
тастыс. Студентыт рў-  
патал хонтыанэ. Ты  
тэла тарвитың накн  
патум ныврамыт ха-  
нищтан мағыс щёпи-  
тавес. Тән ёмас хотпаг  
вос яныгмасыт, люль-  
саң ул вос капыртасыт  
ос элалы эссамтаттэл  
вос олсыт. Тот тән сав  
номтыл ханищтавет,  
ты хосыт олупсаныл  
кўпнитнувөг паты  
тах.

Тувыл «ООО Мега-  
маркет социальных  
услуг — Сургут» нампa  
предприятят рўпи-  
тан хум Степан Про-  
копович мирн нётмил  
варнэ проект варыс.  
Тав рупататэ ширыл

тэл сис округувт яныг-  
сат сөтыра савиткем  
элумхоласн нётмил ва-  
руңкве касаси.

## Ныврамыт ўргалавет

Ань ты талув өвыл-  
тахтам порат, ўщлах-  
тын хоталыт сис Сур-  
гутский район Белый  
Яр павылт яныг щё-  
мьяныл өлнэ нёло-  
ловхуйплов ныврам  
«Ащирма ойка» колн  
мўйлуңкве тотыгла-  
вёсыт. Тән тот щэгтым  
мўйлысыт. Тувыл ань  
ты тэл Россия янытыл  
Театр талыг лаввес. Ты  
кас-тыл ёнгын колыт  
йиквнэ ос эргын яныг-  
сат аквхуйплов ныв-  
рамыт мўйлулпсал мўй-  
луптавёсыт. Тыммағыс  
танки рупата варнэ  
хотпат акв млн ат-  
сат сөтыра солкөви  
тастысыт.

## Элалы өлнэ посың хоталыл хўлтавет

Тувыл ос Лангепас  
ўст МФЦ-колт рўпи-  
тан хум Дмитрий Гор-  
бунов «Мир мағыс ка-  
сыл» нампa проект  
щёпитас.

Ты тэлатэ ширыл  
тав ныврамыт каснэ  
вармалын вөвиянэ. Тән

касункве вос касасча-  
сыт, ты урыл хўлтнэ  
потыр щёпитас, тән  
ётаныл вәщиньтахты  
ос потрами. Савыңпалэ  
та ныврамыт ёт рўпи-  
ты, хотьют маньтагыл  
матыр өвыл варыс ос  
уральтан комиссиян  
хансым олы. Люль ва-  
рум ныврамыт тот ём-  
щакв өлуңкве ханищ-  
тавет. Тән элалы өлнэ  
номтаныл посыңыг  
вос олыс. Мори ул вос  
капыртасыт, ўлнаг ул  
вос хайтсыт.

Наталья Комарова  
ты касылн ялум хот-  
пат пуссын янытла-  
санэ. Тав ты вармалыт  
каснэ маҳум сымын  
рөвнэ латың лавыс.  
Ныврамыт ўргалан ма-  
гыс рупата варнэ хот-  
патын ос яныг пўма-  
щипа лавыс.

Ты коньпал тот ос  
мөт сав пўмаш вар-  
малы олыс, ты касылн  
ялум маҳум пуссын  
янытлавёсыт. Округувт  
пунктотнэ хотпа сав  
олы. Тыгыл элалы кў-  
щаит нас рўпитан хот-  
пат урыл номсахтуң-  
кве патэгыт ке, олуп-  
сав ёмаснувөг ёмты.

**Николай  
МЕРОВ**



Ишхипың маныл вимхуринов



## ЛЯХХАЛЫТ

# Хальүст купса ойка кол хот-щёпитавес

**Х**альүст пёс порат купса ойка Ксенофонт Добровольский олыс. Тав олум колэт ань нъяврамыт магсыл библиотека рүпиты. Ты пёс кол кит тал сыс ёмашакв хот-щёпитавес, ольпыл сартвес, йильпи иснасыл, авил, колканыл вярвес, ювле хультум талт рүпатаныл астрасаныл. Купса ойка хурумсат квадратный метра яныт кол-капай 1876 талт унттыстэ. Ань кол ёмашакв вярнэ магсыл округ олнытыл атпан арыгкем млн солкөви холтвес.

Өвлэт миркол кұщайт тот музей-кол воруң-ит номсысыт. Тувыл купса ойка колэ ёмашакв хунь хот-щёпитавес, нъяврамыт магсыл библиотека тот вярвес. Нэпак ловиньтан колт рүпитан махум 2018 тал сұкыр этпост тув вантласыт. Ты кастыл тан ялпың хотал вәрыгласыт ос Хальүст оlnэ

мир тув вөвыгласаныл.

Ань касың хотал библиотека-колн сав нъяврамыт щаняныл-ащаныл ос ханищтан хотпаныл эт нэпакыт ловиньтаңкве ёхталэгыт. Овыл щёс ёхтын агирищит-пыгрищит купса ойка колыл суссылтавет ос библиотека урыл потыртавет. Тот рүпитан хотпат



акваг савсыр выставкат вәрыглэгыт ос йильпи нэпакыт нъяврамытын суссылтэгыт.

«Светлячок» ос «Солнышко» намп сади-колыгн ялантан мань нъяврамыт купса ойка кол сунсұңкве ос ёхталасыт. Тан магсыланыл тот рүпитан хотпат ялпың хотал вәрыгласыт ос манхурип

нэпакыт акван-атым олэгыт, суссылтасыт ос потыртасыт. Ань библиотека-колн сав нъяврамыт нэпакыт ловиньтаңкве акваг ёхталэгыт.

**Н.А. Буткова, библиотека-кол кұщай нэ, кетум потыр маньщи латңыл Л. Теткина хансыстэ**

# Щёмьят мұсхал щирыл нётавет

**М**ирн нётнэ департаментыт кұщайг Мань Светлана Давиденко рүпиты. Рётың юсвой этпос 12 хоталэт тав ляххал тотнэ хотпат эт хонтхатыглас ос 2018 тал сыс округувт оlnэ мир хумус нётвёсыт, манасавит олн тувле холтвес, та урыл потыртас.

Өвлэт кұщай нэ нъяврамың щёмьят урыл латың лавыс. 2017 талт мән округувт акв саккон округитавес, ты нэпакщирыл 1993-2017 талыт сыс тыт самын патум агирищит-пыгрищит ат сөтыра сокөвил ойтает. Ты олныл тан Россия шар мак яныг саккон 25 талэ товлум кастыл ос нъяврамыт янытлан кастыл майлувёсыт. Нъяврамыт ос маньлат хотпат олныл 2018 тал сыс акв щёс ойтвёсыт.

Кұщай нэ лавыс, сав нъяврам янмалтан ос нуса тотнэ щёмьят олныл тох кётвёсыт. Мотанын өвлэт ищхипың

ут щирыл заявление-нэпак ос намнэпак эт тан палтаныл кетуңкве эрыс. Туп ты юи-палт олныл ойтвёсыт. Щанит-ащит тамле нэпак ат ке хассыт, нъяврамыт магсыл олныл ат майвёсыт. 2018 талт тан 408 сөтыра нъяврам ос маньлат хотпа ат сөтырал ойтсаныл ос тув кит арыгкем млрд солкөви холтсыт.

Савсыр мот нётмылит урыл Светлана Давиденко ос потыртас. Ань ты талныл Россия анытыл «цифровое телевидение» хосыт телевизоранув суссылтаңкве патэгыт. Мән округувт ты вәрмалы

яңк нәтнэ этпост рүпитаңкве овылтахты. Тувыл кина суссылтан пёс тотапыт ты йильпи каналыт суссылтаңкве тах ат патэгыт. Ань махумн йильпи телевизор манос приставкаг лавнэ хусапсов ёвтуңкве эри. Нусаг оlnэ щёмьят ты хусапсов ёвтуңкв ос нэтавет. Тананылн өвлэт ты ищхипың ут ёвтуңкве эри ос тувыл танки нэпаканыл МФЦ-колн тотуңкве, ты юи-палт олныл ювле ойтает.

Мән округувт ань акв млн 649 сөтыра элумхөлас олы. Тан халаныл касың нилыт хотпа мирн нётнэ департаментыл онтасыл вәраве. Округув янытыл 400 сөтыра арыгкем элумхөлас ань нётмил-олныл майлавет. Акв тал округувт оlnэ мирн нётнэ магсыл ты департамент 14

млрд солкөви холты.

1994 тал пәсныл касың талныл савнув агирищит-пыгрищит округувт самын патэгыт. Сав нъяврам янмалтан щёмьят ос савмёгыт. Нуса тотнэ щёмья мощагнув ёмты. 2017 талт округ янытыл 110 нуса щёмья олыс, 2018 талт 77 сотыра щёмьят нусаг лотынртахтасыт. Кұщай нэ лавыс, мән округувт сав ёмас ос эрнэ сакконыт рүпитэгыт ос сав щёмьят танки ёмашакв олуңкве воратэгыт, тиймагсыл махум щёлыңнуге ёмтсыт.

Ты тал мирн нётнэ служба яныгсат талэ товлы, тот рүпитан махум аквта щирыл каркамыг рүпитэгыт ос округувт оlnэ мирн элалы нётэгыт.

**Людмила  
ТЕТКИНА**

# Элын ӧлнэ махум пусмалтавет

**О**круг мир пусмалтан департаментыт кұшай хум Алексей Добровольский ляххал тӧтнэ колн ёхталас. Мӧлтты тӧл махманув хумус пусмалтавёсыт ос ань ты вӧрмаль хум-лег ӧлы, тав ты урыл потыртас.



**К**ұшай хум ювле тох лӧвыс, округувт моща элумхӧлас хоталь щалтыс. Ань Югра мӧт кит щёс сӧвнун нӧврам ӧлуңкве патыс. Мӧлтты тӧл тыт пуссын аквёет лов сӧтыра арыгтем мӧн нӧврам самын патыс.

Сургут ўст йильпи районт ӧлнэ махум магыс кит участковый пұльницаг пұсвесыг. Ань хосан минуңкве ат ӧри, лӧккарыт ляпат рұпитӧгыт. Тувыл Нижневартоск ос Ханты-Мансийск ўсыгт кит яныг колыг ӧвтвёсыг, ӧс пұльницаг тах вӧравӧг.

Кӧсың тӧл лӧккар кұшаит акв товлыңхӧп магыс акв сӧтыра щёс,

нила вертолёт магыс ос нила сӧтыра щёс вуйлӧгыт. Тыммагыс олн ӧйтӧгыт. Тӧл сыс тӧнтыламланщёсаныл янытӧт холтыяныл. Лӧккарыт ӧлын ӧлнэ мӧн пӧвлытын манос сӧлың махум палт тыламлӧлӧгыт. Ты товлыңхӧпыл ос вертолётлы мӧлтты тӧл хұрум сӧтыра сӧвиткем тӧрвит ӧгмыл ӧмтум элумхӧлас пұльницаг тотвес. Ты вӧрмаль ӧлын ӧлнэ хӧтпатн сака нёты.

**О**кругувт рұпитан лӧккаранув ань хұрмит тӧл палыт ищхыпың ут хосыт сӧвсыр тӧрвитың операцият вӧрӧгыт. Тӧн махум ӧгмың сӧңкв ӧхвта-

саныл хот-яктыяныл, та пӧнтсыл пус сӧңкв ӧхвтасыт тув ўнттӧгыт. Ты хосыт хӧтпа ос ӧлалы сӧв тӧл пус-тӧгыл ӧлы. Ты хӧтал мус вӧт нупыл нӧлолов элумхӧлас тох пусмалтавес.

**Т**увыл ты тӧл ма-нос мӧтынтыг сым ос мӧйт ӧгм ӧщ-нэ хӧтпат ӧс тамле тӧрвитың операция-ял тыт вӧруңкве па-тавет тах. Тыммагыс ищхыпың утыт тӧс-тым ӧлӧгыт. Лӧккара-нув акваг ӧлалы ха-ништахтӧгыт, тӧнки тӧрвит ӧгмыт пус-малтӧгыт.

Сургут ўст сым ӧгм пусмалтан пұльница ӧлы. Тот ӧгмың хӧт-пат сыманыл ӧмщакв уральтавет. Ань тыг мус ищхыпың ут хо-сыт ат сӧтыра арыг-тем сӧвит сым ӧгм, акв сӧтыра атсӧт арыгтем ос лувнак ӧгм тыт пусмалтавес. Ӗ-лӧт хӧтпа ӧтпоскем алпитӧ янытӧт ураль-таве, тувыл ущ лӧк-карыт якытлаңкве вуйхатӧгыт. Ань ок-руг пұльницаг унут тыи ӧмас, мир акв юи-пӧлт ат атхатӧ-гыт, хоса ўрхатуңкве ӧс ат ӧри, операция тӧра вӧраве.

**А**нь сӧвыңпӧлэ махум тыт пус-малтахтӧгыт, мӧт ўсы-тын ат минӧгыт. Ю-вле хультум тӧл сыс нилахуйплов сӧты-ра ӧгмың хӧтпат ок-руг пұльницаг унут пус-малтавёсыт. Тыт рұ-питан лӧккарыт пус-сын сӧв тӧл ханищ-тахтасыт, тӧнки рұ-патаныл ӧмщакв вӧ-ганыл.

Тувыл ос мӧлтты тӧл тӧва яныг пұль-ницаг йильпи ищхы-

пың утыл тӧстувёсыт. Ӗгмың хӧтпат пусмал-тан колн тотнэ магыс яныгсӧт нӧлолов ну-пыл ат мӧшинат ӧвт-вёсыт. Ты утыт ань пуссын ӧмщакв рұ-питӧгыт.

**О**кругувт ӧлын ӧл-нэ пӧвлың ма-хум палт лӧккарыт ӧс акваг ӧхталӧгыт. Тыммагыс кӧсың рай-онный пұльницаг мир уральтан ма-нос прививка-тӧрпи тұштын магыс лӧк-карыт акван-атавет. Тӧн туи порат я хо-сыт «Николай Пиро-гов» нӧиңхӧпыл мир пусмалтым яласӧгыт. Мир пусмалтан хӧт-пат Ӗс, Иртыш, Са-квья, Тӧгтӧя ос Кон-да я вӧтат ўнлын мӧн пӧвлытын ӧхталӧгыт. Тӧлы порат ос ищхыпың утыл вӧ-рим мӧшинатыл лӧк-карыт тотыглавет. Ты вӧрмаль щирыл мӧл-ты пуссын аквёет лов сӧтыра арыгтем хӧтпа уральтавес. Пӧв-лың махум ты лӧк-карыт урыл вӧганыл, кӧсың тӧл тӧнаныл ўрияныл.

**К**ұшай хум лӧв-ме щирыл, ок-ругувт ювле хуль-тум атхуйплов тӧл сыс пӧвлыт рұпитан мӧн пұльницаг лап-шар ат пантыглавё-сыт. Ань ты накт мӧн мӧвт сӧтлов нупыл сӧт ФАП-пұльница, налыман нупыл акв амбулатория рұпи-тӧгыт. Ань ты мӧн пұль-ницаг пуссын яныг пұльницаг нупыл хас-вёсыт, тувыл нӧта-вет. Тӧн тӧрпил тӧста-вет ос яныг лӧккарыт ватихал тув ӧхталӧлӧ-гыт.

**Николай МЕРОВ**



# Пёс ос йильпи накыт тара-паттавет

**Россия янытыл Наука**  
янытлан хотал рётың  
ёсвой этпос нёлолов щислат  
ёлыгы. Югравт махум  
пусмалтан, пёс накыт, латһыт,  
ищхыпың утыт ос мот тэлат  
ханищтан, тувыл наука магыс  
диссертация вуянтам савсыр  
учёныит ёлэгыт. Мән тананыл  
пussyн янытлыанў.

Ханты-Мансийск ўсувт Ёсгорский институт 1991 тал пасныл рўпиты, тот pussyн пёс ос йильпи накыт тара-паттавет ос номтың потрыт хансавет. Тот маньщит, хантыт, рушит акван-нётхатым рўпитэгыт ос мот ўсытыт ёлнэ учёныит ёт номсахтым ёрнэ тэла вэрёгыт.

Ты ялпың хоталанылт тән ЮГУТ ханищтахтын агит-пыгыт ос мот мўй хотпат танки палтаныл вёвиньтёлсаныл. Тот история ос этнология вёрмалит ванэ учёный хум

Александр Киселёв «Югра в пространстве исторической антропологии: проблемы интерпретации источников» ёвылтыт потыртас. Тав лавнётэ щирыл, ань pussyн ёлыглам пёс накыт хумус макыг ёлсыт, нёмхотьютын торың ат вавет. Тән ань хотты нёпакыт ловиньтыяныл ке, тох та тэлат тара-паттыяныл. Александр Георгиевич лавыс: «Тёванакт аквта нак савсыр потрытыт лакква-мингалы, таве манавн хумус торгамтаңке? Мән таймагыс акваг номсахтёв, хоты вёрмалит щар макыг ёлсыт, хотты мат мощ сёви хартавет. История тамле вёрмалы, мёлхотал ёлум нак, тыхотал историяг та ёмтыс ос ёлумхолас таве савсырыг потыртаңке вёрмитэ. Мән ос, ётыл самын патум хотпат, та вёрмалы та хансым щирётыл ваңке ос номуңке патылў.



Ань йист ёлнудыт мән акван-ловиньтым нёпакт сунсыяныў ос тот ханищтанёв сыс ёмщакв тара-паттылў. Пёс пормасыт ищхыпың утыл уральтыяныў ос мак латың хансёв».

**Тамара МЕРОВА**

# Порс магыс мансавит олн ойтёв

**Й**ильпи ёвылтахтам талт порсанув ёл тотнэ магыс мот щирыл ойтхатуңке патсёв. Ты ёлы-палт касың щёмья манах квадратный мётраң колт ёлыс, ЖКХ палыл порс ойтнэ магсыл тув ловиньтым олныл пиныглавес. Ань касың щёмьят манах ёлумхолас колт хансым ёлы, тасавит махманыл магыс та ойтхатэгыт. Акв хотпа магыс 133 солкёви ойтунке ёри. Щёмьят акв-кит ёлумхолас ёлы ке, тән аквта савитёт ойтнэ солкёвил хулытсыт. Ос яныг щёмьяң колыт тән тах сав олн ойтунке патэгыт.

Тыи ёмас ман ати, ань ты ёвылтыт потыртаңке пуңкотнэ кўщаит сапранин акван-атыглавёсыт. Тувыл тёва ўсыт ман районыт тән ётаныл ищхыпың ут хосыт потыртасыт. Округт порс атнэ тэлат магыс «Югра Экология» кол пуңкотунке пёриявес. Ань тән ётаныл pussyн мирколыт договор-нёпак вос хансёгыт.

Порс магыс олн ойтнэ савитэ ўсыт ос рай-

оныт щирыл савсырыг ловиньтавёсыт. Тох Ханты-Мансийск, Нефтеюганск, Пыть-Ях, Урай, Нягань ос Югорск ўсыт, тувыл Ханты-Мансийский, Нефтеюганский, Кондинский, Советский ос Октябрьский рай-оныт акв хотпа магыс 133 солкёвил ловиньтавёсыт. Та ўсыт ос районыт «южный регион» лававет, тән ань pussyн договор-нёпак хансым ёныщёгыт. Ос Ме-

гион, Лангепас, Радужный, Покачи, Когалым, Сургут ос Нижневартовск ўсыт, тувыл Сургутский, Белоярский, Хальёс ос Нижневартовский районыт «лўимэ регион» хасвёсыт. Тән акв ёлумхолас ойтнэ тынэ магыс иң ат потыртахтасыт, ёрнэ нёпак иң щёпитэгыт.

Манрыг тамле тариф вёрсыт, ты вёрмалит палт кўщаиг ёлнэ хум Алексей Власов тох лавыс: «Махумныл порс магыс винэ олныт мән 65% машинал тотнэ магыс холтыяныў, порсыт порсаныт лакква-щёпитан магыс 21% олн тув холтаве ос 13% олныт мән ётув рўпитан колытын лакква-ўртыяныў».

Сапранин кўщаит китыглавёсыт, ань тёва щёмья рўтэ колёт

хансым ёлы ос такви тот ат ёлы, ань тән магсыланыл наскассыг олн та ойтэгыт. Тёват хот мот ўст ханищтахтэгыт, мотаныт дачан вантлысыт ос тот ёлэгыт. Тувыл дача ёщнэ хотпа китынтыг порс ойтнэ олныл янас пинаве. Ты махум ювлелаввёсыт, тән та рўтаныл магыс справка-нёпак вос тотэгыт, хот ос манах тал тав ханищтахтым яласы, пыгыт хот ос манах этпос армият тотыглавет, хотталы ўщлахтын мән минасыт ке, юн атимыт ке – яласам билетаныл вос суссылтэгыт ос заяление вос хансёгыт. Та порат мощца олн ойтунке патэгыт.

**Тамара ХАТАНЕВА**

# Сэтап урыл потыр ӧлыс

**С**этап хумус тахтаве, манарыл маныр пӧрыс тоты – ты урыл Ханты-Мансийск ӱст ӧлнэ Центр ремёсел колт потыр ӧлыс. Тот «Нить. Символ. Человек. Нетканый текстиль» намба сус-сылтап вӧрыглавес.



Ты ӧрнэ тӧла урыл ты кол кӱщай Ольга Дмитриевна Бубновене потыртас:

— Сэтап хотыютн тахтаве, хумус вӧраве — ты ӧлумхӧлас палт ӧлнэ пӧс йис тӧла. Ты хӧтал мӧн пӧс порат ос ань йист сэтап вӧрнэ тӧла урыл потыртаҥкве таҥхӧв. Кӧсыҥ мир тавӧн рӧвнэ щирыл сэтап щӧпитас,

тувыл мӧхум халанылт ханищтахтуҥкве пат-сыт.

Пӧс тӧгыл нӧ тахтын йивӧвлыл сэтап вӧрыс. Овлӧт ты йивовлӧ йивн юныгтӧлытӧ, тох те юныгтӧлы, рӱпататӧ ӧмас щирыл мины, маныр номсы, тох и ӧмты. Тувыл сэтап тахтуҥкве ущ ӱнты. Пӧс порат мӧхум йиквуҥкве ӧвыл-

тахтынӧныл ӧлы-пӧлт, ӧс йив юныгтӧгыт. Кӧсыҥ йильпи тӧла порат тох вӧрсыт.

Прялка намба пӧр-тын пӧля манос ӧмп пун нӧгаве. Нӧ хӧтпа тувыл пун харты, тахтын йивӧвлӧ ӧҥхтым пӧрыгтытӧ, сэтап тох та вӧри. Пӧс тӧгыл мӧхум лӧвыгласыт, прялка пӧрт — ты хум хӧтпа торыг тӧла, тахтын йивӧвыл ос сэтап — ты нӧ тав тӧлатӧ. Хунь нӧ хотпа матыр юнты манос саги, тав колтӧгыл мӧхманӧ пуссын юртыҥыщ ӧлӧгыт, пуссын маснут ӧныщӧгыт, нӧмхотыют ат пӧляве. Ӕлнаҥ нӧ тахтуҥкве ат те хӧсыс, тав тох намталавес: «Непряха». Нӧ хӧтпа мӧгыс ты сака лӧль лӧ-тыҥ ӧлыс, тав ань сэтап вӧруҥкве ос юнсхатаҥкве ат хӧсы, щӧмьятӧн нӧмат ӧмас пӧрыс ат тоты. Ома хунь матыр юнты, тав номтӧ ӧмас, мори ат номсахты, сыме рот. Тӧва мӧщтыр хӧтпа матыр щак-вици ос тыхал ӧргащлы.

Сэтап ӱйхул пуныл ос поналныл тахтувес. Пӧс мӧхум сэтап вӧрнэ станокыт ӧщсыт, мӧн ань тамле станокыт нӧнан суссылтаҥкве тахсуб. Ту-выл номсӧв, кӧсыҥ хӧтпа тот пувиньтахтуҥкве тахмай, тувле патӧв, потрув мӧт нупыл ми-ны. Ты урыл мӧн хунь тах янас хӧнтхатыглап вӧрӧв, станокыт палт моц рӱпитӧв, тӧр вӧруҥкве ханищтахтӧв.

Ты кӱщай нӧ потре сака пӱмыщ ӧлыс. Тав нетканый текстиль урыл потыртас — ты хунь хӧтпа поналныл сэтап вӧри, пӧсса ман лӧгыл маснут саги. Ӗльп урыл потыртас, пӧс мӧхум пормасаныл манарыл тӧллысаныл, хумус сартсаныл, та маныр. Ту-выл атхатыглам мӧхум хӧҥхай хурип пумныл колканын нортнут саг-сыт, сэтап тахтысыт, спицатыл носки сагуҥкве ханищтахтасыт.

**Светлана  
МАТВЕЕВА**



Е.А. Бабина сэтап вӧри



О.Д. Бубновене  
прялка суссылты



В.П. Гноевая носки саги



# Тав мот хон ман олукве минас

**Ханты пыг Виталий Сигильетов**  
Хүрүм тал Венгрият олы, тав 2016  
талт Югорский университет асламе юи-  
палт тув минас. Манылат пыг тыт туризм  
тэлат тотнэ ос ма-вит үргалан хотпаг  
хаништахтас. Тувыл Ханты-Мансийскат  
олнэтэ сыс такви щань латһетыл  
пүмшалахтукве патыс.

Виталий самын патум матэт хантыт мощ мот ширыл потыртэгыт, латһаныл «ваховский» лававе. Тан Нижневартоский районт олэгыт ос ты латһыл потыртан хотпа моща хулытс. Ань пыг пёс потырт ловиньты ос юв ёхталанэт порат, махманэ потыртанэныл порат латһе хунтлытэ ос ёмшакв ханищтытэ. Тувыл махманэ потырт ёл-хансыанэ ос ётыл мот финно-угор мирыт латһаныл палт арталыанэ. Тав ань наука магыс матыр рупата вараукве номсы.

**Т**ал котиль этпос юи-овыл хоталанэт Виталий Сигильетов Ханты-Мансийскан ёхталас ос тонт «Югра лылыёп» колт үст олнэ хотпат тав этэ хонтхатыгласыт. Тамле вәрмалы Алла Иштимирова-Посохова «Обь|Чай» намба проектэт щёпиталыс. Пыг мот хон мат олнэ олупсатэ урыл махумн китыглавс ос тав ювле таи потыртас: «Ам Венгриян ЮГУ палныл Дина Васильевна Герасимован кетвёсум. Ман университетув тан ётаныл акван-нётхатым рупитан нэпак хансым оныщи. Тан палтаныл Будапешт, Сегед ос Печ үст олнэ университетаныл ханты ос маныщи латһыг

хаништавёг. Венгрыт савсыр вәрмалит ванэ магыс Югран ялан-таңке ос таңхёгыт. Овыл тал тув ёхтумумт ам венгр латың ханищтасум ос туризм тэланыл пүмшаласанум.

**А**нь китыт курсыт Будапештский университетыт туризм ос ма-вит үргалан вәрмалит элалы ханищтыанум. Ос акторыг Печский университетыт финно-угор мирыт латһытыл ос культурал пүмшалахтёгум. Тот амки щань латһум наука магыс тара-паттылум ос ань йильпи пормасыт манос савсыр тэлат хумус лававет, таит кинсым нэпакн хансыанум. Руш латһыл тан «неологизмыг» лававет. Тамле накыт касың мир палт олыллэгыт. Тувыл тан кастыланыл пёс латһув пентхаты, аквтуп хаштатыг ос мотаныг ёмты.

Венгрыт танки латһаныл үргалыяныл кос, ос тувыл тан мот савсыр мирыт халн тэлыгласыт. Ань мот мирытныл ёхтум сав йильпи латың оныщёгыт, таимагыс ман ань венгранув тара ат торгамтыанув. Тан хосат тагыл киххатасыт ос вагыт: славяныт, румыныт, германцыт ос тюрк мирыт тан магысланыл хаштал махмыг



олэгыт. Венгрыт, насати, шар мот ширыл потыртанэныл, мот ширыл номсёгыт. Тонт элалы киххатаманыл порат, Антал Регули финно-угрыт халт яласамёт, маныщит палт ёхтыс. Тох танки латһаныл хурип маныщит ос хантыт хонтсыт. Тох рүтыг олукве та патсүв. Пёс порат ань олнэ ман вантлуманыл порат савсыр махум ёт хонтхатыгласыт, хотта тан ётаныл хонтлысыт, тувыл рүмалахтасыт, ос тан халанылн та тэлыгтахтасыт.

**Т**ан танки урыл тань тох номсёгыт, венгрыт та хотпа ловиньтахты, хотьютаныл щань латың ваг ос такви латһётыл номсахты. Тувыл йильпи латһыл танки лягаланэныл холт вәрияныл, тамле тэла сакконын хансым оныщияныл. Самын патум хотпа намыл пинаве ке, ос тан щираныл намтавет: Екатерина — тыи Каталин, Иосиф — Йожеф, Степан — Иштван».

Венгрыт пёс мойтаныл ширыл, ты олнэ мортум ман тан кит ягыгыгн тотымат. Акватэ үйрищ кәсалас ос махманэ ёт тав юи-палэт нявылхатас, мотанэ са-



лы кәсалам ос такви махманэ ёт тав юи-палэт хайтум. Та ширыл венгрыт та олнэ мананыл Нёр тапалныл Карпаты мус та вантлысыт. Това учёныит лавёгыт, тан тонт, ул, пёс маныщи ос пёс ханты махмыг олсыт, ос тыт мадыярыг намтвёсыт. Яныгпала махманыл ань тыг мус үйрищ янытлым оныщияныл. Будапешт үст я үлтта вәрим унсахт аңквалыт үйрищ хурил вәрим олэгыт.

**С**алы пентсыл тан слув оныщукве патсыт. Тувыл Виталий тыг венгр махум пёс энтапаныл суссылтаңке тотыглас. Тамле энтапыт лув совныл Озд үст варавет. Ань энтапаныл овылтыт ос акв сака пүмыщ потыр олы, ты урыл янас тах хансёгум.

**Тамара МЕРОВА**



ХУМ ХӨТПАТ ЯНЫТЛЫЯНУВ

# Лүсум мәньщи хум олупсатэ

**С**вердловский областит Сәпса  
үс пөхыт нёрың мәт Тәлтъя  
мәньщи павыл олы. Тот Николай  
Николаевич Пакин, мәньщи хум,  
вөраим олы.



Н. Пакин, апте Никита ос М. Хужахметов

Хум 1961 тәлт Тәлтъя павылт самын патыс. Щёмьянылт тән нила ягыг яныгмасыт. Школат Полуночный павылт нёлолов класс мус хаништахтыс. Тувыл Пума павылт хул алышлым ос вөраим мощ

олыс. Ос 1981 тәлт армиян вуйвес. Кит тәлт элын лүсытас.

Тувыл армияныл юв ёхтыс ос Нягань үсн рупитанкве минас. Тот аквхуйплов тәлт «УМР-06 Краснотенинский нефтестрой» нампә мәт



Тәлтъя павыл

тракторыл яласым рупитас. Норыт хартыглас ос мот савсыр рупата вәрсыт.

Ётыл та рупатаныл пөхын патхатас, ос Полуночный павылн минас, лүимәт сәлум олнанэтыл тот кол ёвтыс. Та павылт нила тәлт олыс, ос овыл ёмтыс, колә найн ёсвес. Тувыл ос Тәлтъя вөр павлән вәнтлыс. Воссыг рупатан нәмхотталь ат патхатыглас, йис мәтәт вөрәяңкве патыс. Тот такви ёрөтыл йильпи кол үнттыс. Москва үст рума оныщи. Та хум Тәлтъян вәтихал үщлахтуңкве ёхталы. Тән аквёет вөркол үнттысыг, та руматә нётыс. Ань юрт хумитә үщлахтуңкве тув акваг ёхталы.

Кол үнттын норытыл миркол пәлыл майвес. Сәртын Сәпса павылт Александр Ершов депутатыг рупитас. Ты күшай хум Ушма павылт мәньщи хөтпат мәгыс колыт үнттыс. Тот ань махманув олэгыт.

Пес порат вөрт сав вөрүй олыс, ят ос сав хул яласас. Тувыл тән йис мәнаныл ляпат нөрт ма-щунит хөнтвёсыт. Тувыл ос савсыр тының

ахвтасыт нөрныл виңкве патвёсыт. Ты хосыт павланыл пөхыт овтын Тәлтъя хул тәлт патыс. Ань тот вит аюңкве ос ат рөви. Тымәгыс мә ёлы-пәлныл янас витвөңхал пасатавёсыт, павлың махум ай-нэ вит тувыл выгыт. Я витә сака пәңктувес, айнэ хурипаг ат хойхаты.

Николай Николаевич ань пенсия-олн выг, вөрколән акваг ёхталы. Яласан лөңханыл тәлы порат нөрт рупитан махмыт тракторыл хот-щөпитыяныл. Төванакт мәнь машинал кол мус ёхтуңкве рөви.

Тав хүрум каңканэ Тәлтъяныл вәт нупыл китыт вёрыстат Пума павылт олэгыт. Тән пуссын нөрт вөраим яласэгыт. Тәнә мәгыс сөрп катын-патталэгыт. Төва нёвляныл матыр тәнупормас мәгыс әл тыналыяныл. Ты коньпал нёхыс алышлэгыт, тох та ләщал лүсум мәньщиянув нөрт олэгыт. Мән тананыл хум хөтпат ялпың хөталыл янытлыянув. Уйхул алышлан сөт вос оныщегыт.

**Николай  
МЕРОВ**



Вөраян амп



ХУМ ХӨТПАТ ЯНЫТЛЫАНУВ

# Пыг «Эпрон» нәиңхәпыл яласы

Семён Алгадьев  
Сань Севастополь  
ўст «Эпрон» наппа  
нәиңхәпыл щәрщит  
яласым лұсыгы. Ты  
тәл тәл котиль этпос  
8 хөталәт мәнъщи  
пыг удостоверение-  
нәпакыл майвес. Тот  
хансым олыс, ань  
ты пәсныл Алгадьев  
Семён Петрович  
морьяк-спасателиг  
ёмтыс ос «Эпрон»  
наппа нәиңхәпыл  
яласаңкве вёрми.



Мәнълат пыг Югорск ўст са-  
мын патыс. Та ўст школа а́стлас,  
тувыл Югорский политехниче-  
ский колледжит ханищтахтас.  
2018 тәл тав диплом-нәпакыл  
майвес, ань тав слесарь КИ-  
ПиА рӯпитанкве вёрми. Ты юи-  
пәлт тәра армиян вуйвес. Лұпта  
этпос 30 хөталәт мөт пыгыт  
ёт Семён Пыть-Ях ўсн ёхтыс.  
Мәнъщи пыг тот китыглавес, хо-  
ты мәт служитаңкве таңхи, төнт  
тав ләвыс, щәрщит нәиңхәпыл  
яласаңкве кәсащи. Тувыл мөт  
пыгыт ёт Санкт-Петербург ўсн  
та кётвес. Щәнягән-а́щәгән ки-  
тыглаве, манрыг морякыг олуң-  
кве тахмаяс, тав ос ювле лә-  
выс, Югорск ўс ляпат я ат овты,  
тыимәгсыл щарыщн минуңкве  
тахмаяс.

Санкт-Петербург ўст тав  
56529-2 военный частин тот-

вес. Төнт мәнълат пыгыт пус-  
сын военный парадын щёпи-  
тахтасыт. Семён ос тув атха-  
туңкве ләввес. Ойттур этпос 29  
хөталәт Санкт-Петербург ўст  
яныг парад олыс. Семён мөт  
мәнълат пыгыт ёт нәиңхәпыл  
лүлим Нева я хосыт тотвёсыт.  
Төнт аквторыг 41 нәиңхәп акв  
юи-пәлт ми́насыт ос товлыңхә-  
пыт нумыл тыламласыт. Яныг  
парад сунсуңкве Россия Пре-  
зидент Владимир Путин ёхта-  
лас. Та ялпың хөтал кина сус-  
сылтан төтапыт Россия яны-  
тыл суссылтавес. Семён щәня-  
ге-а́щәге ос рӯт махманэ ты па-  
рад пуссын суссыт.

Семён ләвыс, ты яныг пара-  
дыт лүлюңкве тавән сака пұ-  
мыш олыс. Төнт тав Владимир  
Путин такви самагётыл кәса-  
ластэ.



Ань тавән иң нила арыг-  
кем этпос лұсытаңкве эри, тав  
ойттур этпос хұрмит хөталәт  
юв тах ёхты. Евгения Влади-  
мировна ос Пётр Ильич нывра-  
мён юв сака ўритән, ос мана-  
сәвит хөтал хультыс, акваг ло-  
виньтэг. Семён армия юи-пәлт  
элаль ханищтахтуңкве номсы.  
Пыг а́ще Хәльүс район Хулюм-  
сұнт пәвылныл олы. Тән рӯта-  
ныл пуссын тот олэгыт.

Мәнъщи хум хөтпанув пус-  
сын ялпың хөталыл янытлыа-  
нув, мав янытыл мир акваг  
вос олы, пыгыт туп мощщан  
армиян вос тотыглавет.

Людмила  
ТЕТКИНА





# Нярихумит павыл мащтыр нэ

**Э**лнаң лапкат матыр сака хунь ӧлыс, маснут, ӧщнут, аны-сан та маныр пуссын катыл вӧруңкве эрыс. Нэ ос хум хӧтпат эрнэ пормасыт мащтырласыт. Ань тай матыр-ати пуссын лапкат ӧлы, туп олн вос ӧщсув. Пес тагыл мањыщиянув халт мащтыр хӧтпа сав ӧлыс, ань тамле махумаквет ӧс ӧлэгыт.

Ханты-Мансийск ӱст ӧлнэ нэ Светлана Михайловна Астапович пес щырыл мањыщи суп, ватаң тӧр, тӧрсахи ос мӧт маснут ӱнты. Тав ӧтэ ам потрамсум, китыплахтасум, хотыл ӧлы, ӱнсхатуңкве хӧт ханищтахтас. Нан ань элалы ты мањыщи нэ потре ловиньтэлың:

— Омам увщитэ Надежда Андреевна Тынзянова сака мащтыр нэ ӧлыс. Ам ань ӧщнэ тӧрсахим анёквам магыс тав ӱнтыгласэ. Хунь тэн атимыг ёмтсыг, суп анумен майвес. Катыл матыр вӧрнэм хус арыг тӧлыг ты ёмтыс. Хунь няврамагум мощ яныгмасыг, номтыл ёхтуңкве патвёсум, ань катыл матыр вӧруңкве татем таңхёгум. Тувыл тыхал ӱнсхатуңкве ӱнтылматыглёгум, манос матыр ӱинёгум. Тох лащал-лащал та ханьщувласум щаквщункве.

— **Светлана Михайловна, наң хотыл ӧлэгын?**

— Ам Октябрьский район Нярихумит павылт самын патсум. Омам наме Фёкла Андреевна, такви ӧпарищ наме Евлахова. Атям рущ хум, мањыщи мир халт яныгмас. Тэн нила няврам янмалтасыг. Ам щар яныг, кит эщ ос апищи ӧнщёгум. Школа астрламум юи-палт Санкт-Петербург ӱст А.И. Герцен намба уни-

верситетт ханищтахтасум, тувыл колтаглум ёт Ханты-Мансийск ӱсн вантлысум. Кит пыг ӧнщёгум, тэн тыт Центр искусств колт ханищтахтасыг. Яныг пыгум саңквылтаңкве хасы, апищитэ катыл хурит пӧслы.

Ам ань акваг щаквщёгум, мањыщи супанум ос тӧр сахиянум паквпалыл ӱнтыанум. Пес порат ӱнтым маснутыт сунсыглыанум, ханищтыанум, хумус тан вӧрвёсыт. Тувыл та щырыл суп ман лагыл маснут ӱинёгум, ты юи-палт ущ ӱнтылум.

Ман ань ӱсың мат ӧлэв, сака мат тарвтың рупата хунь вӧрөв, таимагыс ам ань щаквщим ӱнлахӧлэгум. Надежда Андреевна аквум ат няврам янмалтас, ӱйхул ӧнщас, пил вӧтым, найив атым вӧрн ялантас. Сав рупитаме халт ӱнсхатуңкве алымас, нётнэ паквпалың супыт ӧнщас. Ты ятил мащтыр аквтем сака ӱлылылум, тав ӧвылтам тэлатэ ам ань элалы тотылум. Аквум хурум аги янмалтас — Алла, Любовь ос Татьяна, кит пыг ӧнщас. Ань апыгрищанэ ос апыг апыгрищанэ ӧлэгыт. Нэмхотьютаныл ат ӱнсхаты, тувле тэланыл ати.

— **Наң ань маныр ӱнтэгын?**

— Тынакт Ас мањыщиянув ӧщнэ суп ос



тӧрсахи ӱнтсум. Хунь рупатам оигпас, супагум-сахиягум музейн мӱйлуптасагум. Тара колнор онтсыл нӧх-тагатавесыг, ань ӱс мирн сунсыглавег, пумщалавег. Ам яныгмам павлумт ань тох нэмхотьют ат ӱнты, таимагыс тамле маснут ӧс ӱнтуңкве номсёгум. Хальӱс районт ӧлнэ мањыщи махманувныл хотьют улпыл ӱнты, ат ваглум, ань тувле ат ялантёгум. Аквум ӧлме порат Хальӱс районул ялсум, мащтыр махум тот вӧсум. ӱнсхатанэм коны-пал лагылн маснэ паквпалың щултин сагёгум, сакныл савсыр хорамыт хартёгум.

— **Пыгагын мањыщи лӧтныл потыртэг?**

— Ати, ат торгамтэг. Яныг пыгум ла̄ви: «Ома, хунь элумхӧлас такви лӧтне вагтэ, татем ёмас. ӱн мањыщи ла̄тың ханищтахкве па-

тэв». Сунсёгум, нявраматем щань лӧтне ат ванэ́тэ магыс сыме татем щӧрги, эрыс мањытагыл ханищтахкве. Амти ӧс ат хӱлэгум, таимагыс тэн ӧс ат та торгамтэг. «Лӱимӧ сӧрипос» мањыщи газетав сака эруптылум, ёхты, сунсыглылум, акв ман пинылум.

Ты тӧл ам Тверь ӱс ляпат ӧлнэ карелыт палт ялсум. Ты финно-угор рӱт махманув касың туи Карельский форум вӧрыглэгыт. Янге-мане акван-хӧнтхатыглэгыт, тӧнти лӧтнаныл ханищтэгыт, культураныл нӧх-вӧрмалтыяныл. Пуссын вӧрт ӧлсув, парщин колт эт-хӱлсув, хӱл алыщласӱв, исмит пӧйтсӱв. Амтирот номсёгум, ман, мањыщи махум, ӧс тох вос ӧлнувув, тӧнт тах нявраманув ма́нти лӧтнувтыл потыртанувыт.

**Светлана РОМБАНДЕЕВА**



# Танки латһаныл элаль тотыяныл

**Ю**вле хультум талт Мегион үст  
сосса махум акван-атхатыгласыт.  
Тот сапрәни вәрыглавес. Ты сапрәнит  
хотал нәглын ерт өлнә ханты эква  
Аграфена Семёновна Песикова такви  
щань латһе элаль тотнә урыл потыртас.



Ханты нәквет

**Т**ав Сургутский рай-  
онт өлнә ханты  
махум латһыл мань та-  
гыл потырты. Эква так-  
ви щань латһе урыл  
тох лавыс: «Мән учё-  
ный хотпав Николай  
Иванович Терёшкин  
хансыглам нәпакыт  
хосыт элаль ханищ-  
тахтэв. Ты учёный ой-  
ка 1950 талт Вах я вә-  
тат ос Сургутский рай-  
онт өлнә ханты ма-  
хум потраныл хумус  
суйтэгыт, та щирыл  
ёл-хассанэ ос нәпак та-  
ратас. Мән Касум пә-  
вылт өлнә ханты ма-  
хум латһаныл шар ат  
торгамтэв. Мәнавн  
мәнки щань латһув  
элаль тотуңкве эри».

**А**нь «Ханты ясаң»  
газетат потрыт  
Касум махум латһыл  
хансавет. Тыимәгыс

Сургутский районт кит  
тал палыт ханты ос  
рущ латһыл «Айкол»  
(Ляххал) газета тәра-  
талвес. Ты газета эт-  
пос сыс акв щёс вә-  
рыглавес, махум сака  
ловиньтасыт. Ос тувыл  
ётыл матрыг тав лап-  
пантвес.

**А**графена Семёнов-  
на лавыс: «Ань  
Еремей Айпин ос коор-  
динационный Совет  
тыт рүпитан хотпат  
Югорский универ-  
ситетн, Ас-угорский  
институтн ос ханищ-  
тап элаль тотнә инс-  
титутын латың вос  
кётэгыт. Тән хотал  
нәглын ерт өлнә ханты  
няврамыт магыс щань  
латың ханищтан хот-  
па вос хонтэгыт. Ты  
накт тот учитель-хот-  
па шар ат ханищтаве.



А.С. Песикова Мария агитэ ёт котилыт үнлэг

Мән щань латһув ха-  
нищтан нәпакыт ос ат  
таратавет».

**С**ургутский ос Ниж-  
невартровский  
районьгт Тромаган,  
Аган, Пим ос Юган я  
вәтатсәвмәнылатханты  
агит-пыгыт өлэгыт.  
Тыгыл онтырсәткем  
процент сәвит нявра-  
мыт танки щань лат-  
һаныл сака ёмщакв  
вәганыл. Ос тән ханты  
латһыл хансуңкве ат  
хәсэгыт. Ханищтан  
хотпа тот атим.

Ань Лямина, Рус-  
скинские, Угут пәв-  
лытт пуссын яныгпә-  
ла хотпат учителиг  
рүпитэгыт. Тән юи-  
пәланылт нәмхотыт  
ат хульты. Тыимәгыс  
ань эква лавыс, ок-  
руг ханищтап депар-  
таментын ос латың  
көтуңкве эри. Тән хо-  
тал нәглын ерт өлнә  
хантыт потыртан ла-  
тың щирыл ханищ-  
тап вәтихал вос вә-  
рыглэгыт.

2017 талт Сургутс-  
кий университетт  
щань латың ханищтан  
вәрмалы щёпитәлвес.  
Ирина Семёновна Тыр-  
лина, Мегион үс ляпат  
өлнә ханты нә, ос тув  
алыс. Ты нә ләвнэтэ  
щирыл, тот ань туп акв  
ханищтан хотпа олы.  
Павлың сосса нявра-  
мыт ханищтахтын

вәрмалын тот акван-  
атыглавёсыт.

**О**с тән ётаныл элыл  
ищхыпың ут хо-  
сыт ханищтан вәр-  
малы щёпитануве ке,  
ёмас өлнув. Ты нявра-  
мыт акваг тыгле-тувле  
яласаңкве ат вөрмө-  
гыт. Тамле ханищта-  
пыт вәрыглаңкве па-  
тавет ке, агит-пыгыт  
мүсхалыг хансуңкве  
ханищтахтэгыт. Мән-  
лат хотпат щань ла-  
тың ханищтаңкве акв  
өвылтахтэгыт, тән  
ты тәла щирыл акваг  
элаль вуйхатэгыт.

**А**графена Семёнов-  
на сәв ханищ-  
тан нәпак таратас.  
Атахкем тал ювле хуль-  
тум порат ханты лат-  
һыл сака ёмас букварь  
нәпак таратас, ос шко-  
лат тав нәмхот атим.  
Насати тән Ас-угорс-  
кий институт нас тох  
хуёгыт. Ты нәпакыт  
няврамыт ханищтан  
магыс школатын вос  
минувет. Тот ань Вик-  
тория Ивановна Спо-  
дина күщаиг олы.  
Ты букварь винә ма-  
гыс өвлэт күщайн  
заявление-нәпак хан-  
суңкве, тувыл ос винә  
магыс үсн ялуңкве  
эри.

## ХАНИЩТАП

# Хальүст нйвбрамыт ёт рүпитан нэ

**М**арина Анатольевна Табун, так-ви опарищ наме Лихачева, Хальүс школат мәнһ нйвбрамыт ханищтан нэг рүпиты. Тав Ханты-Мансийск үст педагогический училище а́стлас, ты юи-палт Москва үст М.А. Шолохов намба университетт ханищтахтас. Ханты нэ 22 тал нйвбрамыт ёт рүпиты. Такви олупсатэ ос рүпататэ урыл Марина Анатольевна таи потыр-тас:

— Ам Хальүс район Тэк павылт самын патсум, тот яныгмасум. Овлэт школат Зоя Абрамовна Новьюхован ханищтавёсум. Тав 40 арыгкем тал нйвбрамыт ёт рүпитас, ань пенсият олы. Тав сымың, кәркам ос ёмас хөтпа, такви рүпататэ ёмашакв вәрыстэ, манав сака эруптасанэ. Ам таве ос янытласлум, школан ялантаңкве акваг кәсашасум. Тыммагсыл мәнһтәгыл учитель-хөтпаг рүпитаңкве тахсум. Та порат Тэк павылт олнэ сав агит-пыгыт Ханты-Мансийск үсн ханищтахтуңкве минасыт. Омаң ос акваг лавыглавёсум, учителиг вос рүпитәгум. Ты юи-палт Ханты-Мансийск үсн минасум. 1996 талт диплом-нәпакыл майвёсум ос ювле яныгкем павлус рүпитаңкве ёхтысум. Та порат Тэк павылт пёс школа рүпитас. Кол сака ащирмаң олыс,

агиришит-пыгришит масхатым ханищтахтасыт. Төва порат тув мус ащирма олыс, вётрат витэ тув пөлиглавес, хаснэ пәрт тармыл мел щар ат хансыс. Төнт рүпатаныл пөхын минуңкве тахсум, тувыл нйвбраманум хумус хультуптыяңум, элаль тох та рүпитасум. Павлувт мөт йильпи кирпаш школа хунь унттувес, төнт ёмасыг ёмтыс.

Тувыл ам Хальүст олнэ колыл майвёсум, щёмьяң тәгыл олункве тув вантлысум. Школат элаль рүпитаңкве тот патсум. Овил ханищтахтам агирищанум-пыгрищанум школа хосат а́стласыт, төват ань танки нйвбрам оныщегит.

Округ янытыл мащтыр махум ос нйвбрамыт ёт рүпитан хөтпат савсыр ханищтапын вәтихал акван-атыглавет. Ам тамле семинарытын ос ялантәгум. Мөлт тал мәнһполь



ётпост мащтыр махум Ягрим павылн вөвыглавёсыт. Төнт Хальүс район янытыл олнэ нэквет нуйсахи йинсыт ос хорамыл юнтсаныл. Матъёмас ам ос тув ялсум, нэ хөтпат ёт хөнтхатыгласум, сав эрнэ вәрмалит урыл тот хулсум. Любовь Васильевна Кашлатова лекция-потрыт ловиньтас. Тав савсыр хурит суссылтас, хоты хорамыт хоталь юнтуңкве рөви. Ам ты потрыт ёмашакв хунтлысанум ос нәпакн пуссын хасанум.

Школавт кружок рүпитас, тот ам нйвбрамыт юнсахтуңкве ханищтасанум. Хальүст олнэ мәнһщи, ханты нэнт ты рүпата вәруңкве а́нумн ос нётсыт. Ань кружок лап-пантвес, воссыг ат рүпиты. Тув ялантан нйвбраманум ёт мән Хальүст «Модница» намба касылн вөвыглавёсүв. Район янытыл олнэ агит-пыгыт танки юнтум маснутаңыл тот кәсың тал суссылтыяңыл. Мөлт тал ты касылт мән овил места висүв. Нйвбрамыт ёт мән ханты маснот юнтсув ос касылт хурум пыг урыл мөйт суссылтасүв. Сосса щёмьят нйвбрамыт ху-

мус мәнһ тәгыл ханищтавет, та урыл тот потыртасүв ос суссылтасүв. Мәнәвн ты маснот юнтуңкве Хальүст олнэ мәнһщи ос ханты нэквет нётсыт.

Ты элы-палт ам «Сорни сэй» намба нйвбрамыт у́щлахтын мāt рүпитасум. Ты у́щлахтын мāt Хальүс ляпат олыс. Тот мән мәнһщи ос ханты культураг урыл потыртасүв, юнсахтуңкве ос щәнһ ләтңыл потыртаңкве агиришит-пыгришит ханищтасанувм. Ань у́щлахтын мәнһл воссыг ат рүпиты. Нйвбрамыт тув ялантаңкве тай сака кәсашасыт.

Урай ос Сургут үсыгн рүпатам щирыл кётыглавёсум. Нйвбрамыт у́щлахтын мāt хумус рүпитаңкве эри, тот потыртавёсүв. Тув ялуңкве ос мөт номтың хөтпат хунтлуңкве а́нумн ос сака пүмыщ олыс.

Марина Анатольевна сав тал нйвбрамыт ханищтым рүпиты. Такви рүпататэ сака ёмашакв вәритэ, тыммагсыл сав щёс «Педагог года» намба касылн кётыглавес. Рүпататэ кәркамыг вәрнэтә мәгсыл сав янытлан нәпакыл майлаве.

**Людмила  
ТЕТКИНА**





# Тав щань латңе янытлытэ

**Т**ы этпос 21 хөталэ ЮНЕСКО организациян щань латың хөталыг намайавес. Касың тал ты хөталт ма янытыл олнэ мирыт танти латңыл потыр хансэгыт. Округует олнэ маньщиянув тамле хонтхатыглап ос варыглэгыт. Ман мавт сав мирыт олэгыт, касың такви латңе эруптытэ, мире янытлытэ.



Киргиз маньлат махум стихыт ловиньтэгыт



М.К. Волдина ос тән поэтаныл

Ам ань киргизка нэ урыл потыртэгум, наме Курманбюбю. Тав этэ сав мирыт аквэет мүйлын ялпыңхөтал порат вайхатасум. Нэ татем нётнэ маснутыл олыс, хораманэ шар сөрни холът нас вольгегыт. Олупсатэ урыл китыгласлум, хотыл олы, кол-тагыл махманэ юн щань латңыл потыртэгыт ман ати. Курманбюбю тох ты лавыс:

— Юн ман манти латңувтыл потыртэв. Ам киргизский эрыг сав вагум, эргегум. Пес йис мойтанув эт яныгмасум. Касың мат няврам щань латңыл мойт хунтлым яныгми, мойт тал няврам хунь олы.

— **Наң хөт яныгмасын?**

— Ам Киргизият Чуйский район Шанси павылт 1959 талт самын патсум, тот яныгмасум. Ань ман мав Кыргызстаныг лававе. Курман Байрам наппа сака яныг ялпың хөталт самын патсум, таимагыс тох намтвесум. Омам ат номилум, ам иң маниг олмум порат тав атимыг емтыс, агмыл хартыс. Кит каңк, кит увши оньсегум. Атяв яныг хонтын ялыс, тувыл ехтыс, манав тактет янмалтасанэ. Ам «Ома» латың ат та лавсасум, туп атямн невитавесум.

Ам яныгмамум порат Советский Союз олыс, ман пуссын кит латңыл потыртасув —



Курманбюбю

киргизский ос руц латңыл. Школат руц ос манти латңувтыл ханищтахтасув. Ман, киргиз няврамыт, руцит эт яныгмасув, аквэет енгасасув, алхатасув. Ам руц юртнэ оньсегум, Омск үст олы, ань ам палтум мүйлуңкве ехтыс, сав тал юртыңыщ олымэн.

— **Хунь тыг олмыгтасын?**

— Россиян ам 1977 талт ехтысум. Брянск үст хурум тал ханищтахтасум. Тот хум варсум, наме Вадим. Тав этэ Чита үс нупыл минасамэн, тот Краснокаменск үст аквхуйплов талт олсумэн, аквам шахтат рупитас. Кит аги янмалтасмэн, Мерим ос Алина. Хунь Советский Союз лакква-патыс, ман тыгле вантлысув. Ойкам тыт хотталы шалтыс. Агиягум сас рупитэг, щемьяңыг емтсыг. Ам ань ат апыгрищ оньсегум.

— **Курманбюбю, наң татем нётнэ маснутыл олэгын. Тамле маснут нан туп ялпыңхөталт масыглэгын?**

— Ты торсахиянув лавиянув — чапан. Маснутанум-кента-

нум пуссын Киргизстанын юнтылталсанум. Кентум кос юн, кос ялпыңхөталыт порат пинтлылум. Ман савсыр супыт, юбкат оньсегв. Ман олнэ мавт касың щемья юн тамле пүтыскал оньщи. Нэ такви катыл юнты, ватал тохритэ. Колканын пиньянув, тох үнлахолэв, үщлахтэв, хуйгалалэв. Ты пүтыскал Мерим агим тав юнтыс. Кит апыгрищагум «Лылың сөюм» колн ялантэг, тот маньщи йиквйт ос эргыт ханищтэг.

Курманбюбю апыгрище наме Назик, 11 талэ төвлыс. Агирищ лавыс, маньщи няврамыт эт енга-саңкве ос ханищтахтуңкве тавэн сака пумыщ, аквэет йиквэгыт, маснут сагегыт, сакныл матыр хорам хартэгыт.

Матъемас ман мавт олнэ мот хон махум тамле сымың хөтпат, танти латңаныл эруптыяныл, ман латңув янытлыяныл, ман мирув эт юртыңыщ олэгыт.

**Светлана РОМБАНДЕЕВА**

# «Мāньхāпум элаль та тотаве»

2019 тал Россияв яныгыл Театр талыг лаввес. Мāнавн тамле нак ос мұсты, пēs мāхманув олманылт тāнки халанылт ос кās вārсыт, сāvсыр ёнгилыт, ошхуль вārсыт. Тувыл Ый йиквнэ вāрмалъ сāv мирн вāве, ты овылтыт пēs нēпакытыт хансым олы. Хōт, хумус ёнгункве ос тўлыглахтункве эри, мāн сосса хōтпанув хосат тāгыл хāссыт.



«Хōтал» намба Āс-угорский мāхум театрув ос акв йильпи спектакль вāрыс. Руц щирыл «Моя калданка уплывает вдаль» намаим олы. Мōлал тав овыл щēs мāхумн суссылта-вес. Ты спектакль американский потрыт хас-

нэ хум Теннесси Уильямс «Орфей сходит в ад» пьесатэ щирыл вāр-вес. Таве Санкт-Петербург ўсныл ёхтум режиссёр Евгений Абраменко щēпитастэ. Мāнлат хум артистыт потыртан лātнаныл мощ мōт щирыл хасса-



нэ ос тувыл мāньщи ол-нэ накыт тув нётум-тасанэ. Александр Тургачев тот сāнквылтапыл сāнквылты ос акв руц эрыг мāньщи лātныл толмашлым эргитэ.

Тувыл спектаклянылт, ёнгын колнаканылт, хōт-ати сāлайлым найпосыт щēпитавёсыт, тамле ёныг Петрозаводсканыл ёхталам хум Егор Кукушкин вāрункве номылматас.

Тот Юлия Яркина, Татьяна Фоминых, Татьяна Огнёва, Валентин Неттин, Августа Могульчина ос Генна-

дий Ершов сāvсыр сценат нэглапāлсыт. Артистыт кит щēскем мāщтырыг ёнгысыт, тувыл акв мāt спектакль ёл-пōилттāлвес ос сус-нэ мāхум щāй аюн-кве вōвыглавёсыт. Тамле нак, сōль, ос эрыс вāрыглаңкве. Тот ол-нэ хōталт олум акв пи-лищмаң нак урыл потыртасыт, мāхум та сунсум тāрвитаныл мощ хот вус ёрувласаныл, ўш-лахтункве лāvвёсыт.

Тал сыс ты спектакль ос суссылтаве тах, нāн ялэн, сунсэлын.

**Тамара МЕРОВА**

## 50-тāлэтл янытлылўв!



Тал котиль этпос вāt хōталэт Надежда Константиновна Маслова 50 тālэ тōвлыс. Тав Хāльўс район Хулюмсўнт пāвылт олы ос сāv тāl школа искусстват рўпиты. Тот āгиришит-пыгришит нётнэ пормасыт вāрункве ос хурит пōслункве ханищтыянэ. Надежда Санкт-Петербургыт А.И. Герцен намба университет āстлас, тот этнокультурологыг ханищтахтас. Мирыт оцнэ пēs накыт пўмщалаңкве тавён сака мұсты.

Намхōталэт Надежда Константинов-

на Ханты-Мансийск ўсн Оксана āгитэ палт мўйлуңкве ёхталас. Тэн тыт āгитэныт «Хōтал» намба Āс-угорский театр суссылтам хўрум спектаклин ял-сыг. Надежда сака щāг-тым олыс, тав тāна-ныл хосат сунсуңкве тахсанэ.

Мāн пуссын таве 50-тāлыл янытлылўв, пус кāt, пус лāгыл, Тōрум ёт, Отыр ёт вос олы! Ос матыр ёмас номтанэ тēлаг вос ёмтэгыт.

**«Лўимā сēрипос»  
редакцият  
рўпитан хōтпат**



## ХУМ ХӨТПАТ ЯНЫТЛЫАНУВ

## Чечня мāt хөнтлам мәнълат пыгкве

**М**әнъщи редакциявн  
Хальўсныл пицма  
ёхтыс. Хум хөтпат янытлан  
хөтал кастыл Марина Табун  
потыр кётыс. Тав таи хансыс:

— Ам Хальўс районт Тэк пāвылт олум мәнълат ханты пыг Юрий Алфёров урыл потрум мины. Юрий ёт акв классын ялантасмён. Тав ома-тэ Лидия Сидоровна Алфёрова Тэк пāвылт школат нйврамыт ханты лātңыл потыртаңкве ханищтасанэ. Та порат ханты лātңыл ханищтан нэпак мошща олыс, тав ты нэпакыт такви хансыс, сāvсыр ёнгыт щāнь лātңыл вāрыглас. Ам Лидия Сидоровна сака ёмашакв номилум, тав āнум ос ханты лātңыл потыртаңкве ханищтастэ. Пыг āтятэ Александр Иванович Алфёров интернатыт нйврам ўргалан хөтпаг сāv тāl рупитас. Яныг каңке Александр ос пāвлың нйврамыт ханищтас. Мот каңке Владимир Тэк пāвылт школат кўцаиг олыс.

Юрий Тэк пāвылт школа āстламе юи-пāлт Тобольск ўст учителиг ханищтахтас. 1998 тāлт армиян вуйвес ос Чечня мāн тотвес. Та порат та мāt хөнтлан нак овылтахтас. Акв тāl сыс ханты пыг Чечня хөнтлас. 1999 тāлт яңк

нāтнэ ётпос овыл хөталныл Юрий контрак-нэпак щирыл тот хультыс. Хөнтлан мāt мәнълат пыг разведчикыг олы.

Тувыл акв порат Лидия Сидоровна ос Александр Иванович палт пылщмаң пицма ёхтыс, тот хансым олыс: «Тāl котиль ётпос 31 хөталёт 1999 тāлт Юрий Алфёров мот сāt мәнълат хумыт ёт разведкан кисхатуңкве минас. Грозный ўст Старопромысловский районт тāн «БМП №308» нампa яныг мāшинанылн снаряд хōяс ос нōх-пёлаяс. Та мāшинал миnam мāхум пуссын тāра хотталь тотыгпавёсыт. Тāн халанылт Юрий Алфёров олыс». Нила ётпос юи-пāлт Юрий юв тотвес, Тэк пāвылт ёл-щёпитавес.

Та мāt хөнтлым мāглын тагатан пōсыл майвес, руц лātңыл «Орден Мужества» намаим олы. Ты мāглын тагатан пōс щāнён-āщён майвес. Чечнят разведкекыг ос командирыг олыс, пилтāl хөнтламе мāгсыл сāvсыр янытлан нэпакыл майлуves. Ты нэпакыт ос тēнатэн майвёсыт.

Щёмьят Юрий шар мāнь пыгыг олыс, ома-тэн-āтятэн ос каңкагён сака эруптавет. Чечня мāныл тав ома-тэ ак-





ваг пицма хансыглас, ос потре оигпан порат акваг акв лātың хансыс: «Ома, наң шар мāнь пыгын Юра». Лидия Сидоровна мāнь пыге хансум пицмат юн акван-атыгласанэ. Пыгён хунь āтимыг ёмтыс, пицманэ лўньным акваг та ловиньтасанэ.

Рётың юсвой ётпост хум хөтпат янытлан хөтал элы-пāлт Хальўс библиотекан нйврамыт вōвыглавёсыт. Нэпак ловиньтан колт рупитан мāхумн Юрий Алфёров кастуves. Тэк пāвылт ос Хальўст олнэ рутанэ тув ос вōвыглавёсыт. Рут мāхманэ Юрий урыл тот лātың ос лāvсыт. Нйврамытын тав хуриянэ, мāглын тагатан пōсанэ, янытлан нэпаканэ сусылтавёсыт.

Тамле сусылтапыт ос хөнтхатыглапыт нэпак ловиньтан колт рупитан хөтпат таимāгсыл вāрыглэгыт, āгирищит-пыгрищит тамле пилтāl хөнтлам мәнълат пыгыт урыл сāvнуv вос вāгыт.

Ханты-Мансийск ўст военный комиссариат-кол пōхат яныг памятник вāрвес, та яныг пāртын Афганистаныт ос Чечня мāt хөнтлам ос та мāt порслым хөтпат наманыл хансым олэгыт, ханты мәнълат пыг Алфёров Юрий Александрович наме тув ос хансым олы.

**Мария Табун, кётум  
потыр мәнъщи лātңыл  
Людмила Теткина хансытэ**



# Вәрнэ нэпакув 30 тәлэ төвлум кастыл янытлавесүв

**А**нь мән яныг  
Аялпың хөталув  
та минас – ты этпос  
11 хөталэт «Лүимә  
сэрипос» 6выл номере  
нәглум пәсыл 30 тәлэ  
төвлыс. Сәв мир мән  
өтув хөнтхатыглаңкве,  
мән өтув потрамаңкве  
ань өхталасыт.

Ўсувт Иртыш я вәтат  
йильпи колт акв колнак  
«Обь/чай» тох намтвес.  
Ялпың хөталув яныт-  
лаңкве тот рүпитан  
нәквен Алла Ишtimi-  
рова-Посохован мән  
тув ты вөвыглавесүв.  
Ты элы-пәлт Ханты-  
Мансийскат өлнэ кә-  
сың мәнщи хөтпа  
пищмал тетыслүв, тән  
өс пуссын тув вос өх-  
талэгыт.

Яныгпәла мәхум,  
мән мир, мән яныта-  
нүв хөтпат ты өхты-  
сыт. Мән ос мәнщи су-  
пыл масхатасүв. Пасан  
вәтат үнлым ос щай аим  
потрув газетав урыл  
та овумлас. Өвлэт ре-  
дактор нә Людмила  
Теткина хурит суссыл-  
тым потыртас, хоты  
мәхманув ос хунь газе-  
тавт рүпитасыт. Тувыл  
мән таратам ловинь-  
тан нэпаканув суссыл-  
тасанүв.

Еремей Айпин мән-  
нав янытлаңкве өс өх-  
талас, ләвыс, газетавн  
ляххалыт хаснэв коны-  
пал матыр нас ловинь-  
тан потрыт өс вос хан-  
сэв. Ань ты йис мәнщи  
мирув халт поэт ман



писатель хөтпа әтим.  
Светлана Динисламова  
туп тав стихыт мәнщи  
ләтңыл хансуңкв вөр-  
ми, нэпакыт тараты.  
Мөт хөтпат өс кос хан-  
сэгыт – ты М.Т. Двиня-  
нинова, Г.Н. Ларионо-  
ва, нас тән ураныл нәм-  
хотьют ат вәг.

Округувт яныгпә-  
ла хөтпат Советанылт  
күщайг Александр Ми-  
хайлович Константи-  
нов өлы, тав ань кәсың  
хөтпавн янытлан нэпак  
мис. «Югра лылыөп» ор-

ганизация пәлыл Алек-  
сей Шесталовн яныт-  
лавесүв. Тав өс мәннавн  
янытлан нэпак мүйлуп-  
тас.

Ягримт өлнэ мәнщи  
эква Тамара Семенов-  
на Мезенцева мәннавн  
сәв емас, сымың ләтың  
мәнщи ләтңыл ләвыс.  
Мән таве хунь вөвилүв,  
тав акваг нөты. Татья-  
на Дмитриевна Слин-  
кина, Мария Тихоновна  
Двинянинова, Светлана  
Силиверстовна Динис-  
ламова ос мөт мәнщи

хөтпанув пуссын мәннав  
янытласаныл.

Мөтыт хөтал мән яныг  
күщаянүв мән рүпитан  
колувн өхталасыт, об-  
щественный связь де-  
партамент колт рүпи-  
тан хөтпат тән мәннавн  
янытласаныл. Ләвсыт,  
«Лүимә сэрипос» газе-  
та рүпитан мәнщи мән-  
нав, сөль, яныг ос эрнэ  
рүпата ань ты вәрөгыт  
– щән ләтңаныл элаль  
тотыляныл. Тох ты мән  
янытлавесүв.

**Валентина ВАСИЛЬЕВА**



## Луима сэрипос

(Северная заря)  
№4 (1190), 21.02.2019  
Соучредители  
Дума, Правительство  
Ханты-Мансийского  
автономного округа – Югры  
Издатель  
Департамент общественных  
и внешних связей Ханты-  
Мансийского автономного  
округа – Югры

## Редакция

Врио директора –  
**Кондина Г.Р.**  
Телефон (3467)33-22-72

Заместитель гл.редактора –  
**Кондина Г.Р.**  
Телефон (3467)33-22-72

Ответственный секретарь –  
**Уэль В.В.**  
Телефон (3467)33-23-09

Адрес редакции и издателя:  
628011, г.Ханты-Мансийск,  
ул.Комсомольская, 31  
тел./факс (3467)33-17-52

Е-mail: [gazeta@khanty-yasang.ru](mailto:gazeta@khanty-yasang.ru)  
Газета размещена на сайте  
[www.khanty-yasang.ru](http://www.khanty-yasang.ru)

## Отпечатано:

ООО «Новости Югры-  
Производство» г. Сургут,  
ул. Маяковского, д. 14.

Индексы **04399, 54399**

Тираж **1710** экз.

Заказ **775**

Цена свободная

Мнение авторов  
публикаций не  
обязательно отражает  
точку зрения редакции.

Газета зарегистрирована  
Управлением Федеральной  
службы по надзору в сфере  
связи, информационных  
технологий и массовых  
коммуникаций по Тюменской  
области, ХМАО-Югре и  
ЯНАО.

Свидетельство о регистрации  
ПИ №ТУ  
72-00795 от 23 января 2013г.